

Sameinað Sílikon hf.
Stakksbraut 9
230 Reykjanesbær

Reykjavík 23. ágúst 2017
UST201702-122/S.P.
08.08.02

Áform um stöðvun rekstrar

Kísilver Sameinaðs Sílikons hf. var gangsett þann 11. nóvember 2016. Frá upphafi rekstrar kísilversins hafa komið upp fjölmörg vandamál við mengunarvarnir sem ekki hafa, enn sem komið er, verið leyst. Gríðarlegur fjöldi kvartana hefur borist Umhverfisstofnun frá upphafi rekstrar og eru kvartanir vegna ólyktar umfangsmestar þar sem fram kemur að vart verði við ýmis líkamleg einkenni samfara ólyktinni.

Þann 13. mars 2017 var rekstur kísilversins takmarkaður við einn ljósbogaofn og ákveðið að fram skyldi fara verkfræðileg úttekt. Með hliðsjón af ráðstöfunum fyrirtækisins var ákveðið að sú úttekt skyldi afmarkast við mat á ráðstöfunum rekstraraðila. Mjög umfangsmikið eftirlit hefur verið haft með kísilverinu frá upphafi vegna tíðra atvika sem upp hafa komið og fjölmargra kvartana íbúa.

Umhverfisstofnun stöðvaði starfsemi verksmiðjunnar með bréfi dags. 25. apríl 2017 í kjölfar mikils óstöðugleika ofnsins, fjölmargra kvartana og brunaatviks sem leiddi til stöðvunar.

Eftir yfirferð gagna um úrbætur og áætlunar um ítarlegar mælingar mengunarefna heimilaði Umhverfisstofnun með bréfi dags. 19. maí 2017, endurræsingu á ljósbogaofni kísilversins.

Niðurstöður eftirlits og staða úrbóta:

Frá gangsetningu verksmiðju Sameinað Sílikons hf. hefur Umhverfisstofnun borist ríflega eitt þúsund kvartanir frá íbúum Reykjanesbæjar vegna mengunar og skráð hafa verið yfir 20 frávik.

Staða helstu frávika sem skráð hafa verið:

1) Frávik frá gr. 2.3. Reykhreinsivirki

Hönnun og rekstur verksmiðjunnar skal miðast við að halda rykmengun og annarri mengun niðri. Jafnframt mega engar rykuppsprettur vera án virkra mengunarvarna sem uppfylla kröfur um bestu fánlega tækni, sbr. gr. 2.3. í starfsleyfi Sameinaðs Sílikons hf.

- Frávik frá ákvæðinu var fyrst skráð í eftirliti þann 4. janúar 2017.
 - Í eftirlitsskýrslu kemur fram að við eftirlit hefði loft í ofnhúsi verið reykmettað og sjáanlegur reykökkur í kringum ofnhúsið þar sem reykur leitaði út um op og loftræstitúður á húsinu.
 - Jafnframt var skráð annað frávik frá sama ákvæði í eftirlitinu, þ.e. að við hreinsun á stíflu í viftu hefði losnað út töluvert magn kísilryks. Settur var öflugri mótör til þess að stíflur myndist ekki og telst því frávik lokið.

- Þann 17. febrúar var á ný skráð frávik frá ákvæði 2.3
 - Í eftirlitsskýrslu kemur fram að reykhreinsivirkið annaði ekki þeim reyk sem myndaðist í ofni verksmiðjunnar.
 - Þá var jafnframt skráð annað frávik frá ákvæðinu varðandi hönnun og rekstur verksmiðjunnar vegna þeirrar lyktarmengunar sem berst frá verksmiðjunni. En verksmiðjan nær ekki að halda þeirri mengun niðri líkt og áskilið er í gr. 2.3. í starfsleyfinu.
- Þann 4. apríl var skráð eitt frávik frá ákvæðinu þar sem minna reykhreinsivirki verksmiðjunnar annar ekki reyk sem myndast við töppun og útsteypingu. Hafði það valdið reykmenngun fyrir utan ofnhús. Umhverfisstofnun óskaði eftir tímasettri áætlun um úrbætur vegna fráviksins með bréfi dags. 28. júní sl. Sú áætlun hefur enn ekki borist stofnuninni.

Úrbætur:

- **Minna reykhreinsivirki:** Fyrirliggjandi eru upplýsingar um áformaða uppsetningu á reyksíu. Gera má ráð fyrir að uppsetning slíkrar síu myndi bæta reykhreinsun frá útsteypingu og töppun. Ítarlegri upplýsingar vantar um hvernig þessu verki miðar og hvort aðrar ráðstafanir séu áætlaðar við reykhreinsun.
- **Lyktarmengun:** Verulegur óstöðugleiki hefur verið á rekstri kísilverksins sem orsakar ófullkomnari bruna á hráefnum í ofni sem er talið valda lyktarmengun. Þrátt fyrir að gerðar hafi verið ráðstafanir varðandi frekari lokun ofnsins hafa önnur vandamál valdið því að veruleg lyktarmengun er enn af starfsemi. Hefur lyktarmengun vegna kísilverksmiðjunnar verið staðfest við eftirlit og jafnframt með skynmatsaðferð MATÍS, sbr. skýrsla útgefin í maí 2017. Líkt og áður hefur komið fram í bréfi dags. 13. mars sl. hefur starfsleyfi Sameinaðs Sílikons hf. ekki að geyma heimildir til lyktarmengunar, en hvorki var fjallað um lyktarmengun í matskýrslu né umsókn um starfsleyfi. Því er um að ræða ófyrirséða mengun en ólykt telst til mengunar samkvæmt skilgreiningu á mengun, sbr. 5. mgr. 3. gr. laga nr. 7/1998, um hollustuhætti og mengunarvarnir. Umhverfisstofnun telur nauðsynlegt að gerð verði ítarleg greining og skýrsla um yfirferð búnaðar og úrbætur framkvæmdar bæði á búnaði og verklagi og að Umhverfisstofnun verði send fullnægjandi gögn þar um.

2) Frávik frá gr. 2.5. Hreinsun úrblásturs

Virke hreinsun skal vera á útblæstri frá verksmiðju Sameinaðs Sílikons sbr. gr. 2.5 í starfsleyfi verksmiðjunnar.

- Frávik frá ákvæðinu var skráð í eftirliti þann 17. nóvember 2016 þar sem hreinsun var ekki með fullnægjandi hætti frá 14-16. nóvember en lækka þurfti afsog um helming á meðan skipt var út pokum í tveimur hólfum hreinsivirkisins. Vegna mannlegra mistaka var afsogið ekki sett á fyrr en að morgni 16. nóvember en viðgerð lauk kvöldinu áður. Vegna mannlegra mistaka var afsog ekki sett á fullt afl fyrr en daginn eftir. Fráviki telst lokið.

- Þann 22. nóvember 2016 var aftur skráð frávik frá ákvæðinu þar sem hreinsun útblásturs var ekki nægileg, við handstýringu á styrk afsogs var lokað fyrir afsogið í stað þess að auka það. Af þeim sökum varð mikil reykmengun frá ofnhúsi tímabundið. Eins kom upp atvik í lok eftirlits þar sem að sjálfstýring á afsogsbúnaði virkaði ekki sem skyldi og varð því mikill sýnilegur reykur frá ofnhúsinu. Brugðist var við atvikinu og afsog sett á fullan styrk og telst frávikinu lokið.
- Aftur var frávik skráð 23. nóvember 2016 vegna þess að í upphafi rekstrar hafði reykahreinsivirkið ekki verið starfrækt þegar brennsla á timbri frá byggingartíma fór fram til að kynda upp ofninn. Auk þess höfðu atvik komið upp þar sem hreinsun frá útblæstri hefði ekki verið nægileg. Verkferill vegna nýs ofns var endurskoðaður og verklagi breytt varðandi sjálfvirka stillingu á reykahreinsivirki. Telst frávik lokið. Ekki hafa verið skráð frekari frávik frá gr. 2.5.

Úrbætur: Framangreind frávik frá gr. 2.5. má rekja til mistaka í verklagi í verksmiðju Sameinaðs Sílikons hf. Þrátt fyrir að frávikin teljast lokin þá telur Umhverfisstofnun mikilvægt að verklag sé verði treyst til að koma í veg fyrir mengun frá verksmiðjunni. Fram hefur komið að rekstraraðili ætli að taka upp umhverfisstjórnunarkerfi. Umhverfisstofnun óskar eftir upplýsingum um hvernig upptöku umhverfisstjórnunarkerfis miðar.

3) Frávik frá gr. 2.2. Frágangur á lóð

Í grein 2.2. er fjallað um frágang á lóð, þ.e. hráefnisgeymslur, vörugæmslur og eldsneyti.

- Frávik frá greininni var fyrst skráð í eftirliti þann 23. nóvember 2016. Í eftirlitsskýrslu kemur fram að sum hráefnanna væru spilliefni (electrode paste) og að það þyrfti að huga sérstaklega að geymslu þeirra, fram kom að þáverandi geymsla væri í stórsekkjum á malarlóð. Umhverfisstofnun gerði einnig athugasemd við að hráefnin væri geymd á ósteyptu plani þar sem það getur haft áhrif á hreinleika þeirra.
- Í sama eftirliti var skráð annað frávik frá greininni þar sem geymslur utandyra væru að hluta á svæði sem ekki væri afgirt (en lokað fyrir akandi meðferð með stórum steinum)
- Þann 15. desember 2016 var enn á ný skráð frávik frá gr. 2.2. Þar sagði að hráefni (rafskautamassi), sem er hættulegt umhverfinu, væri geymt óvarið á lóð rekstraraðila. Fráviki er nú lokið þar sem spilliefni er allt komið inn í geymslu. Rekstraraðili hefur óskað eftir leyfi fyrir því að geyma rafskautamassa úti á grundvelli nýrrar skýrslu frá NIVA (Norsk Institute for Water Research) um að rafskautamassi sé ekki skaðlegur umhverfinu. Framangreind skýrsla er til skoðunar hjá Umhverfisstofnun. Verður rekstraraðila send viðbrögð á næstu vikum.
- Í eftirliti þann 4. apríl 2017 var skráð frávik frá ákvæðinu vegna þess að olíugeymir er geymdur á lóð án árekstravarnar og glussi og önnur efni eru geymd í tunnum á lóð án lekabyttu.
- Í sama eftirliti var skráð frávik vegna þess að slagg (hreinsunargjall) var yfir mörkum í útskolunarprófi og má því ekki geyma á óbundnu slitalagi. Með bréfi dags. 28.júní sl. óskaði Umhverfisstofnun eftir tímasettri áætlun um úrbætur vegna fráviksins. Hún hefur enn ekki borist stofnuninni.
- Í eftirliti þann 17. apríl 2017 var einnig skráð frávik frá ákvæðinu þar sem hráefnisgeymslur verksmiðjunnar skemmdust í roki fyrr á árinu og tjald fauk upp af

grindum. Gerð var krafa um að hráefnisgeymslurnar yrðu lagfærðar sem allra fyrst. Umhverfisstofnun hefur ekki borist tímasett úrbótaáætlun vegna fráviksins en óskað var eftir því með bréfi dags. 28. júní sl. Frestur var veittur til 20. júlí.

Úrbætur: Gerðar hafa verið úrbætur á geymslu spilliefna með því að færa efnin inn.

- **Lagfæra þarf hráefnisgeymslur sem skemmst hafa í roki.**
- **Koma skal fyrir árekstrarvörn á lóð við olfugeymi og lekabyttu þar sem glussi og önnur sambærileg efni eru geymd.**
- **Tryggja skal undirlag undir slagg (hreinsunargjall) með bundnu slitlagi.**
- **Ganga skal snyrtilega frá lóð að öðru leyti.**

4) Frávik frá gr. 2.4. Sængursteypa

Meðferð efna í ferlum sem valdið geta rykmengun og/eða uppgufun skal fara fram í lokuðum rýmum eða eiga sér stað þar sem afsog tengist hreinsun ryks.

- Skráð var frávik þann 7. desember 2016 frá gr. 2.4. varðandi það að sængursteypa hefði hvorki afsog né reyksöfnunarbúnað en mikill reykur myndast við ferlið.
- Hætt var að nota sængursteypu en aftur þurfti að grípa til hennar dagana 15. og 16. ágúst vegna bilunar á hringekju verksmiðjunnar. Myndaðist reykur vegna notkunar. Gert hefur verið við hringekjuna.

Úrbætur: Nauðsynlegt er að upplýsa Umhverfisstofnun er áformað er að notast við sængursteypu og í hvaða mæli, sem og hvaða mengunarvarnir eru fyrirhugaðar. Kanna slík áform að leiða til endurskoðunar á ákvæðum starfsleyfis.

5) Frávik frá gr. 2.1. Móttaka og flutningur hráefna

Við flutning á hráefnum skal rykmengun haldið í lágmarki.

- Í eftirliti þann 17. apríl var skráð frávik frá ákvæði 2.1. en á meðan á eftirliti stóð var verið að færa hráefnispoka við hráefnisgeymslur með gaffallyftara. Mikið rok var og pokinn rifnaði þegar honum var lyft upp og dreifðist innihald hans vel fyrir utan. Því var beint til rekstraraðila að verklag sé þannig að rykmengun verði í lágmarki, s.s. við flutninga í miklum vindi.

Úrbætur: Umhverfisstofnun hefur ekki borist tímasett úrbótaáætlun vegna fráviksins en óskað var eftir því með bréfi dags. 28. júní sl. Frestur var veittur til 20. júlí.

6) Frávik frá gr. 4.6. Tilkynningar um mengunaróhöpp

Þann 22. nóvember var skráð frávik frá gr. 4.6. þar sem ekki hafði verið tilkynnt til Umhverfisstofnunar og heilbrigðisnefndar mengunaróhöpp sem höfðu átt sér stað í verksmiðjunni. Upplýsingaflæði er nú betra og telst frávik lokið af hálfu Umhverfisstofnunar.

7) Frávik frá gr. 3.2. Skráningar

Í eftirliti 23. nóvember var skráð frávik frá gr. 3.2. þar sem skráningum hafði verið ábótavant hjá rekstraraðila. Ekki var búið að innleiða rafrænt skráningarkerfi fyrir mengunaróhöpp og viðbrögð við þeim sem og eftirlit, viðhald og prófanir á mengunarvarnarbúnaði. Þessi atriði voru skráð í stílabók en þær skráningar eru ekki fullnægjandi.

Úrbætur: Rekstraraðili hefur tekið upp rafrænt skráningarkerfi, Umhverfisstofnun minnir á að rekstraraðila er skylt að skrá reglulega upplýsingar í samræmi við gr. 3.2 í starfsleyfi. Umhverfisstofnun óskar eftir upplýsingum um hvort uppfærslur hafi verið gerðar skráningarkerfi. Gert er ráð fyrir að farið verði yfir skráningar í næsta eftirliti.

8) Frávik frá gr. 1.6. Tilkynning um rekstrarstöðvun

Í eftirliti þann 7. desember sl. var skráð frávik frá gr. 1.6 þar sem Umhverfisstofnun var ekki tilkynnt um rekstrarstöðvun en tilkynna þarf eftirlitsaðila strax um stöðvun rekstrar og þegar notkun hefst aftur hafi starfsemi legið niðri. Umhverfisstofnun fær nú tilkynningar frá rekstraraðila og telst frávik þvi lokið.

Mengunaróhöpp í verksmiðju Sameinaðs Sílikons hf.

Nokkur mengunaróhöpp hafa orðið í verksmiðju Sameinaðs Sílikons hf. Þann 4. apríl kviknaði eldur í vörubrettum inn í ofnhúsi verksmiðjunnar meðan verið var að opna töppunarholu. Skaust þá heit glóð á vörubrettin sem ollu brunanum og því ljóst að umgengni hefur verið ábótavant og bæta þurfi verklag.

Þann 18. apríl kviknaði í einangrandi timburgólfi og veggjum umhverfis rafskaut á efstu hæð verksmiðjunnar vegna útleiðsu. Umhverfisstofnun hefur ekki borist brunaskýrslu vegna eldsvoðans en samkvæmt upplýsingum rekstraraðila kviknaði í tveimur hæðum kísilversins og olli töluverðum skemmdum.

Óhapp varð í verksmiðjunni þann 17. júlí sl. þar sem verklag var ekki rétt þegar skipt var um töppunarholu. Mikill þrýstingur vegna rafskauta varð þá til þess að deiglu yfirfylltust og heitur málmur bræddi rafbúnað á töppunarpalli, skemmdir urðu á gólfi og teinum fyrir deigluvagna.

Framangreind óhöpp í verksmiðju Sameinaðs Sílikons hf. hafa leitt til þess að ljósbogaofn verksmiðjunnar hefur stöðvast og valdið mengun í kjölfarið.

Staða frá endurræingu ljósbogaofns þann 21. maí 2017

Umhverfisstofnun stöðvaði starfsemi kísilverksmiðju Sameinaðs Sílikons hf. með bréfi dags. 25. apríl 2017. Rekstraraðila var ekki heimilt að gangsetja ljósbogaofn verksmiðjunnar nema með leyfi stofnunarinnar. Heimilaði stofnunin slíka endurræingu með bréfi dags. 19. maí sl. Í aðdraganda heimildar til endurræingar hafði verið unnið að viðgerðum og endurbótum sem taldar voru líklegar til að skila árangri í að draga úr lyktarmengun. Meðal annars var hlerum á ofninum breytt til að auka lokun ofnsins, þannig að afgangshiti hækki og stuðli þannig að eyðingu óæskilegra lyktarmengandi efna.

Eru nú liðnir rúmlega þrjú mánuðir frá því að stofnunin heimilaði endurræingu á ofninum. Forsendur uppkeyrslu voru endurbætur á ofni og jaðarbúnaði sem ætlað var að tryggja hærri afsogshitastig. Endurbætur voru taldar líklegar til árangurs af ráðgjafafyrirtækjum Sameinaðs Sílikons hf og Umhverfisstofnunar. Jafnframt lá til grundvallar ákvörðun um endurræingu ítarleg mæliáætlun NILU. Borist hafa fyrstu niðurstöður mælinga, þær fela ekki í sér fullnægjandi skýringar á lyktarmengunina. Vegna sumarleyfa hjá NILU hefur dregist að greina og taka saman skýrslu um greiningar annarra mælinga. Von er á niðurstöðum greininga NILU í lok ágúst. Vegna vísbendinga sem fram komu í mælingum

NILU var talið mikilvægt að mæla einnig efnin formaldehýð og phenyl maleic anhydride. Þar sem mæliáætlun frá NILU um frekari mælingar hafði ekki borist en kvartanir á sama tíma fjölmargar um lykt og rekstur verksmiðjunnar óstöðugur ákvað Umhverfisstofnun að standa fyrir sérstakri mælingu á formaldehýði, brennisteinstvíoxíð og kolmónoxíð. Sá Nýsköpunarmiðstöð um mælingar, ekkert mældist í íbúðahverfi en væg lykt fannst en virtist mjög staðbundin. Í síuhúsi mældist formaldehýð við greiningarmörk mælitækisins eða um 0,2 ppm. Kolmónoxíð mældist þá um 125 mg/m³.

Í ákvörðun um endurræingu var jafnframt kveðið á um að Umhverfisstofnun yrðu send yfirlit um afl ofnsins jafnóðum.

- Fjölmargar kvartanir um lykt og líkamleg einkenni því samfara hafa borist á þeim tíma sem liðin er frá endurræingu. Ber kvörtunum í flestum tilvikum saman við skert afl í ljósbogaofninum og hvernig vindáttum er háttað.
- Afl ljósbogaofnsins hefur verið óstöðugt frá endurræingu, helstu ástæður fyrir því sem rekstraraðili hefur nefnt eru rekstrarvandamál vegna rafskauta, töppun og útsteyping, leki í kælikerfi, glussaleki ásamt ýmsum atvikum.
- Reykhreinsun frá töppun og útsteypingu hefur verið ábótavant.
- Hringekja, sem er tengd afsogi, hefur oft bilað og hefur ýmist þurft að hella í mót við hliðina á afsogi eða grípa til sængursteypingar með tilheyrandi reykmenkun.
- Úrbótum vegna annarra frávikna er tengjast verklagi og hráefnisgeymslum er enn ólokið.

Niðurstaða

Samkvæmt 40. gr. laga nr. 7/1998 um hollustuhætti og mengunarvarnir, sbr. breytingar sem tóku gildi 1. júlí sl., skulu rekstraraðilar tryggja að starfsemi þeirra sé í samræmi við ákvæði laganna, reglugerða settra samkvæmt þeim, starfsleyfisskilyrði og almennar kröfur. Ef frávik verða skal rekstraraðili upplýsa eftirlitsaðila tafarlaust um það og grípa tafarlaust til nauðsynlegra ráðstafana til að tryggja að öllum kröfum vegna starfseminnar sé framfylgt eins fljótt og auðið er.

Samkvæmt 9. gr. reglugerðar nr. 787/1999 um loftgæði skulu forráðamenn fyrirtækja og stofnana skulu sjá um að reykur, ryk og lofttegundir, sem eru hættulegar, daunillar eða lyktarmiklar, valdi ekki óþægindum í nánasta umhverfi.

Þrátt fyrir auknar mælingar liggur enn sem komið ekki fyrir skýring á því hvaða efni valda ólykt frá kísilverinu sem lýst hefur verið í kvörtunum íbúa og staðfest hefur verið við eftirlit. Sóttvarnalæknir hefur fylgst með málinu og starfað með Umhverfisstofnun að mati á áhrifum starfseminnar. Þau einkenni sem gerð hefur verið grein fyrir geta t.d. stafað af anhýdríðum sem mælst hafa og/eða formaldehýði. Vísbendingar hafa komið fram við mælingar m.a. um losun formaldehýðs og anhýdríð og staðfest er að formaldehýð mælist í síuhúsi. Framleiðsla kísilvernsins hefur í för með sér losun ýmis konar mengandi efna. Fyrir liggur að hlutfallslega meira af mengunarefnum myndast við ófullkominn bruna. Mögulegt er að mati Umhverfisstofnunar að samlegðaráhrif mismunandi efna skýri neikvæð áhrif. Rekstur kísilvernsins hefur verið verulega óstöðugur og brunni oft á tíðum ófullkominn.

Fyrir liggur að mati stofnunarinnar að rekstur kísilvernsins hefur í för með sér veruleg óþægindi fyrir íbúa í nánasta umhverfi verksmiðjunnar. Einnig hafa borist kvartanir frá starfsmönnum annarra fyrirtækja á iðnaðarsvæðinu.

Þrátt fyrir tilteknar úrbætur hafa komið upp bilanir í búnaði. Einnig hafa mistök í rekstri leitt til atvika sem haft hafa í för með mengun. Verklag við móttöku og flutning hráefna hefur verið ábótavant.

Telur Umhverfisstofnun því nauðsynlegt að farið verði ítarlega yfir gæði framleiðslu- og mengunarvarnabúnaðar m.t.t. öryggis mengunarvarna. Einnig telur stofnunin nauðsynlegt að gerðar verði úrbætur á verklagi í með það að markmiði að koma í veg fyrir atvik sem leitt geta til mengunaróhappa.

Umhverfisstofnun telur nauðsynlegt að gerð verði ítarleg skýrsla um yfirferð búnaðar og úrbætur framkvæmdar bæði á búnaði og verklagi og að Umhverfisstofnun verði send fullnægjandi gögn þar um. Ekki er talið fært að heimila endurræingu kísilversins fyrr en nauðsynlegar úrbætur hafa verið framkvæmdar á framangreindum frávikum og ítarlegt mat lagt á úrbætur.

Eins og að framan greinir er um að ræða ítrekuð frávik frá starfsleyfi Sameinaðs Sílikons hf. Umhverfisstofnun telur eins og áður hefur komið fram að frávik, einkum varðandi lyktarmengun, vera alvarleg.


Umhverfisstofnun áformar því að stöðva starfsemi Sameinaðs Sílikons hf., sbr. 3. tl. 1. mgr. 26. gr. laga, nr. 7/1998, um hollustuhætti og mengunarvarnir, ef annað hvort afl ljósbogaofns verksmiðjunnar fer niður fyrir 10 MW eða stöðvast í klukkustund eða meira, þó eigi síðar en 10. september nk. Ekki verður þá heimilt að endurræsa ofninn nema með skriflegri heimild að loknum endurbótum og mati á þeim. Rekstraraðila gefst kostur á að gera athugasemdir við áform stofnunarinnar. Frestur til að koma að athugasemdum er til 30. ágúst nk., sbr. 13. gr. stjórnslulaga, nr. 37/1993.

Jafnframt er til skoðunar hjá Umhverfisstofnun hvort endurskoða þurfi tiltekin ákvæði starfsleyfisins.

Vakin skal athygli rekstraraðila á því að Umhverfisstofnun hefur heimildir samkvæmt 26. gr. laga nr. 7/1998, um hollustuhætti og mengunarvarnir, til þess að knýja á um framkvæmd ráðstöfunar samkvæmt fyrirætlum stofnunarinnar svo sem fram kemur í starfsleyfi.


Ákvörðun um stöðvun starfsemi mun verða birt á vefsíðu Umhverfisstofnunar komi til slíkrar ákvörðunar. Jafnframt mun stofnunin birta á vefsíðu sinni sjónarmið fyrirtækisins.

Umhverfisstofnun vekur athygli á 1. gr. gjaldskrár Umhverfisstofnunar nr. 535/2015, þar sem segir að stofnunin innheimti gjald fyrir útselda vinnu sérfræðings við verkefni og þjónustu sem stofnuninni eru falin í lögum og reglugerðum og sem heimilt er að taka gjald fyrir. Gjald fyrir vinnu sérfræðings við eftirfylgni vegna frávika frá ákvæðum starfsleyfis verður innheimt samkvæmt gjaldskrá.



Kristín Linda Árnadóttir
forstjóri

Virðingarfyllt



Sigrún Agústs dóttir
sviðsstjóri

